



Fidoyilik —
Vatanga xizmat demak!

2023-yil 21-sentabr, payshanba,
112 (23.833)-son

**KUN
HIKMATI**

Hayotni
anglashdan
ko'ra uni
o'zgartirish
osonroq

1913-yil aprel oyidan chiqa boshlagan



z.uz



h

/twitter.com/z.uz

O'ZBEKISTON RESPUBLIKASI PREZIDENTI SHAVKAT MIRZIYOYEVNING BIRLASHGAN MILLATLAR TASHKILOTI BOSH ASSAMBLEYASINING 78-SESSIYASIDAGI NUTQI

Hurmatli rais janoblari!

Hurmatli Bosh kotib janoblari, delegatsiyalar rahbarlari, xonimlar va janoblar!

Birlashgan Millatlar Tashkiloti Bosh Assambleyasining bugungi sessiyasi xalqaro munosabatlar tizimida fundamental o'zgarishlar yuz berayotgan bir sharoitda bo'lib o'tmoqda.

Jahon miqyosida ishonch inqirozi kuzatilmoqda. Global xavfsizlik institutlari faoliyatidagi muammolar va xalqaro huquq me'yorlaridan chekinish kuchaymoqda. Va bularning barchasi keng ko'lamdagi keskinlik ortishiga sabab bo'lmoqda.

Geosiyosiy qarama-qarshiliklar tufayli savdo, investitsiya va innovatsiya sohalarida erkin almashish yo'lida yangi to'siqlar vujudga kelmoqda. Hatto iqlim o'zgarishlari, ochlik va tengsizlikka qarshi kurash singari butun bashariyat taqdiriga daxldor bo'lgan masalalarda ham o'zaro muloqot izdan chiqqani sezilmoqda.

Bunday murakkab sharoitda amaliy hamjihatlik va hamkorlik ruhini saqlash, umumiy manfaatlarni mavjud ziddiyatlardan yuqori qo'ygan holda, mamlakatlarni jipslashtirish g'oyasi har qachongidan ham dolzarb bo'lib bormoqda.

Biz o'tgan yili umumiy xavfsizlik va taraqqiyotga qaratilgan "Samarqand birdamlik tashabbusi"ni ilgari surdik. Asosiy maqsadimiz mamlakatlarimiz va xalqlarimizning bugungi kuni va istiqbol uchun mas'uliyatni har tomonlarga chuqur anglash, ochiq va konstruktiv hamkorlikka tayyor barcha tomonlarni global muloqotga jalb qilishdan iborat.

Birlashgan Millatlar Tashkiloti Bosh kotibi tashabbusi bilan kelgusi yil Kelajak sammiti o'tkazilishi xalqaro va mintaqaviy taraqqiyotning dolzarb muammolarini hal etishga, Tashkilotimizning ta'siri va samaradorligini yanada oshirishga xizmat qiladi, deb ishonaman.

Muhtaram anjuman ishtirokchilari!

Biz huquqiy, dunyoviy, demokratik va ijtimoiy davlat bo'lish Yangi O'zbekistonda barpo etish siyosatini qat'iy davom ettirmoqdamiz. Mamlakatimiz "Inson qadri va manfaatlari uchun" degan ezgu g'oya asosida demokratiya va adolat tamoyillarini mustahkamlashga qaratilgan tub islohotlar yo'lidan dadil ilgari bormoqda.

Joriy yil aprel oyida milliy taraqqiyotning ustuvor yo'nalishlarini belgilab beruvchi yangilangan Konstitutsiya bo'yicha O'zbekiston tarixida birinchi marta umumxalq referendumini o'tkazildi. Referendumda ovoz berganlarning 90 foizdan ziyodi ushbu chinakam xalq Konstitutsiyasini qo'llab-quvvatladi. Shu tariqa islohotlarimizning ortga qaytmaydigan muqarrar tus olishi ta'minlandi.

Biz Asosiy qonunimizda millati, tili va dinidan qat'i nazar, barcha fuqarolarning tengligi, inson huquqlari, so'z va vijdon erkinligi prinsiplariga sadoqatimizni yana bir bor tasdiqladik.

Mana shunday huquqiy asosda "O'zbekiston – 2030" taraqqiyot strategiyasini qabul qildik. Bu strategiya Birlashgan Millatlar Tashkilotining "Barqaror rivojlanish maqsadlari"ga uyg'un bo'lib, biz o'z zimmiyalarimizga olgan barcha majburiyatlarni to'la va qattiq bajarib bormoqdamiz.

Hurmatli xonimlar va janoblar!

Izchil davom etayotgan islohotlar natijasida O'zbekiston iqtisodiyoti, global tahdidlarga qaramasdan, barqaror o'sish sur'atlarini namoyon etmoqda. So'nggi olti yilda yalpi ichki mahsulot hajmi bir yarim martadan ortiq ko'paydi. Bizning bosh maqsadimiz – 2030-yilga qadar bu ko'rsatkichni yana 2 barobarga oshirishdir.

Iqtisodiyotimizni liberallashtirish yo'lidagi yana bir ustuvor vazifamiz – yaqin orada Jahon savdo tashkilotiga to'laqonli a'zo bo'lishidir.

Xalqimizning turmush darajasini oshirishga qaratilgan siyosat tufayli mamlakatimizda 2017-yildan buyon kambag'allik ikki barobarga kamaydi. Biz 2030-yilgacha uni 7 foizga tushirishni reja qilganimiz. Aholini ichimlik suvi, sog'liqni saqlash, ta'lim va boshqa ijtimoiy xizmatlar bilan ta'minlash ko'lamini bir necha bor oshirishni belgilaganimiz.

Biz Birlashgan Millatlar Tashkiloti Bosh kotibi tomonidan ilgari surilgan "Ish o'rinlarini yaratish va ijtimoiy himoya global akseleratori" borasidagi

tashabbusni qo'llab-quvvatlaymiz. Mazkur tashabbus doirasida tajriba almashish uchun 2024-yili Birlashgan Millatlar Tashkiloti shafeligida "Ijtimoiy himoya: barqaror taraqqiyot sari yo'l" butunjahon konferensiyasini yurtimizda o'tkazishni taklif etaman.

Hurmatli sammit ishtirokchilari!

So'nggi yillarda O'zbekistonda inson huquqlarini himoya qilish bo'yicha e'tiborga loyiq natijalarga erishdik. Mamlakatimizda majburiy va bolalar mehnatiga to'liq barham berildi.

Bir asr mobaynida O'zbekistonda millionlab insonlar paxta terimiga majburiy ravishda jalb etib kelingi. Har yili sentyabr oyidan dekabrgacha aholining asosiy qismi – o'qituvchi va shifokorlar, tadbirkorlar, ishchi va xizmatchilar, eng achinarlisi, maktab o'quvchilari va talabalar paxta terimiga safarbar qilinardi. Buning natijasida o'zbek paxtasiga boykotlar e'lon qilingan, mamlakat esa yillar davomida "qora ro'yxat"larga kiritilgan edi.

Qat'iy irodamiz tufayli endi bularning barchasi o'tmishga aylandi. Xalqimiz paxta qulligidan butkul ozod bo'ldi.

Yangi Konstitutsiyamizda majburiy mehnat taqiqlanishi kafolatlab qo'yildi va buning uchun jinoyi javobgarlik belgilandi. Majburiy va bolalar mehnatiga qarshi kurashni butun dunyo miqyosida kuchaytirish zarur, deb hisoblayman. Bizning tajribamiz shuni ko'rsatmoqdaki, bunga chek qo'yish imkoni bor.

Xonimlar va janoblar!

Inson kapitalini rivojlantirish va kreativ yosh avlodni tarbiyalash – O'zbekiston o'z oldiga qo'ygan strategik vazifalardan biridir.

Biz hamma uchun ochiq va sifatli ta'limni kambag'allikka barham berish, xalq farovonligini oshirish va barqaror iqtisodiy o'sishga erishishning eng samarali omili, deb bilamiz.

Mamlakatimiz oxirgi yillarda bu borada katta tajriba to'pladi – ta'lim tizimi tubdan o'zgarmoqda. O'tgan olti yilda maktabgacha ta'limdagi qamrov 21 foizdan 70 foizga, oliy ta'limda esa 9 foizdan 38 foizga yetdi. 2030 yilga qadar har bir bolaning bog'chaga qatnashi, maktabni bitirayotgan har ikki o'quvchining biri esa oliygohda o'qishi uchun imkoniyat yaratiladi.

Hurmatli delegatsiyalar rahbarlari!

So'nggi yillarda Markaziy Osiyo yaxshi qo'shnichilik, barqarorlik, o'zaro hamkorlik va rivojlanish yo'lidan bormoqda.

Birgalikdagi sa'y-harakatlarimiz tufayli O'zbekiston barcha qo'shnilari bilan davlat chegaralari, transport koridorlari va suvdan foydalanish bo'yicha muammolarni bartaraf etishga muvaffaq bo'lmoqda.

Mintaqa davlatlari o'rtasida o'zaro savdo ikki yarim barobardan ziyod, qo'shma korxonalar soni esa besh marta o'sdi. Mintaqamiz iqtisodiy rivojlanish markaziga, Sharq va G'arbni, Shimol va Janubni bog'laydigan transport-kommunikatsiya ko'prigiga aylanib, unga qiziqish tobora ortib bormoqda.

Markaziy Osiyoning dunyoga ochiqligi – mintaqaravonlik va barqaror rivojlanishini ta'minlaydigan eng muhim shartga aylanmoqda.

Ishonch bilan aytish mumkin, bizning xalqlarimizni mintaqaviy o'ziga xoslikni anglash tuyg'usi birlashtirmoqda va bu tuyg'u tobora kuchayib bormoqda. Bizning nafaqat tariximiz, balki kelajagimiz, hayotiy muhim manfaatlarimiz ham umumiy va mushtarakdir. Mintaqaviy hamkorligimizni kengaytirishdan boshqa yo'limiz yo'q va bo'lishi ham mumkin emas!

Aminmanki, xalqaro hamjamiyatning qo'llovi bilan Markaziy Osiyo birdamlik yo'lidan borishda davom etadi. Markaziy Osiyoni tinch va gullab-yashnayotgan hududga aylantirish O'zbekiston tashqi siyosatida bundan buyon ham ustuvor maqsad bo'lib qoladi.

Muhtaram anjuman ishtirokchilari!

Aholisining deyarli yarmi yosh avlod vakillari bo'lgan Markaziy Osiyo uchun yoshlar va ularning salohiyatini ro'yobga chiqarish masalasi ayniqsa dolzarb ahamiyatga ega. Ushbu sohada hamkorlikni kuchaytirish maqsadida yaqinda mintaqamiz davlatlari tomonidan Yoshlar siyosatining umumiy yo'nalishlari haqidagi bitim imzolandi.

(Davomi 2-sahifada) >>>



21-sentabr – SamDU kuni

MADRASAI OLIYADAN DORILFUNUNGACHA



Sharof Rashidov nomidagi Samarqand davlat universiteti tarixi buyuk olim Muhammad Xavofiy 1420-yilning 21-sentabrda 100 dan ortiq tinglovchilar oldida Klavdiy Ptolomey nazariyasi bo'yicha ma'ruza qilgan – Mirzo Ulug'bek madrasasi tashkil etilgan kundan boshlanadi. O'sha kundan e'tiboran ish boshlagan Mirzo Ulug'bek madrasasida talabalar diniy bilimlar bilan bir qatorda algebra (al-jabr), geometriya (handasa), huquq (fiqh) va boshqa fundamental fanlardan saboq ola boshlagan edi.

Yozma manbalar va ilmiy izlanishlar Samarqand davlat universiteti Mirzo Ulug'bek madrasasining bevosita vorisi ekanligini tasdiqlaydi. Demak, joriy yilda Samarqand davlat universiteti tashkil topganiga 603 yil bo'ldi.

Ushbu madrasaga o'sha davrning eng ilg'or muallim va olimlari jalb etilgan. Muhimi, fandagi bu an'analar o'sha davrdan buyon davom etib kelyapti. Samarqand dorilfununi endilikda ham mintaqadagi eng nufuzli ilm maskanlaridan sanaladi.

Bugungi kunda Samarqand davlat universitetida 25 mingdan ortiq talaba tahsil olmoqda. Ularga 839 nafar professor-o'qituvchilar ta'lim bermoqda. Oliy ta'lim dargohida 12 ta fakultet va 59 ta kafedra mavjud.

Elektron arxiv qanday bo'ladi?

Dunyo arxivchilari Samarqandda jam bo'ldi

"Ipak yo'li" turizm va madaniy meros xalqaro universitetida MDH ishtirokchi davlatlari arxiv xizmatlari rahbarlari maslahat kengashining 19-yig'ilishi bo'lib o'tdi. Unda maslahat kengashi a'zo davlatlari arxiv ishi rahbarlari, mutaxassislar, olimlar, jamoatchilik faollari va yoshlar ishtirok etdi.



Mazkur kengash 2004-yil 3-dekabrda arxiv ishi bilan bog'liq dolzarb masalalarni hamkorlikda ko'rib chiqish, hujjat almashishdagi muammolarni bartaraf etish maqsadida tashkil etilgan. Maslahat kengashi tarkibiga Ozarbayjon, Belarus, Qozog'iston, Moldova, Armaniston, Rossiya, Tojikiston va Qirg'iz Respublikasi arxiv xizmatlari rahbarlari kiradi. O'zbekiston 2021-yil 24-fevraldan ushbu kengashga doimiy ishtirokchi sifatida qo'shildi va bu yilgi maslahat kengashiga raislik qilmoqda.

- Har ikki yilda o'tkaziladigan maslahat kengashidan asosiy maqsad arxiv ishi sohasida tajriba almashish va elektron arxiv hujjatlarini tartibga keltirishdan iborat, - deydi "O'zarxiv" agentligi direktori o'rinbosari Sherzod Sodiqov. - Mazkur kengashga rasman a'zo bo'lganimiz arxiv ishi va ish yuritish bo'yicha muammolarni hal etishga qaratilgan xalqaro anjumanlarda faol ishtirok etish,

respublikada amalga oshirilayotgan ishlar sifatini xalqaro talablar va andazalar darajasiga ko'tarish imkonini beradi. Shuningdek, respublikamizdan tashqarida bo'lgan arxiv hujjatlarini aniqlash va ularning asl yoki elektron nusxalarini qaytarish masalalarini ijobiy va tezkor hal etishdagi jarayonlarni maqbullashtirish borasida bir qator imkoniyatlarni yaratadi. Shunday imkoniyatlar sabab hozirda ushbu maslahat kengashida kuzatuvchi maqomida ishtirok etish taklifi bilan chiqayotgan davlatlar soni ortmoqda. Xususan, bugungi kengashda Turkiya, Xitoy, Vengriya kabi mamlakatlardan vakillar ishtirok etyapti.

Tadbir doirasida "Arxivlar va elektron hujjatlar: davr talabi" mavzusida xalqaro ilmiy-amaliy konferensiya o'tkazildi. Konferensiyada 40 dan ortiq xorijlik ekspertlar qatnashdi. Soha mutaxassislarining elektron hujjatlarini jamlash, hisobini olib borish, saqlash va foydalanishni tashkil

etish bo'yicha ilmiy ma'ruzalari tinglandi.

- Sohada zamonaviy texnologiyalarni joriy etish, xususan, raqamli texnologiyalardan foydalanish bugun oldimiza turgan asosiy vazifalardan biri, - deydi Qirg'iz Respublikasi Raqamli rivojlanish vazirligi huzuridagi arxiv xizmati raisi Mariya Aliboyeva. - Arxiv hujjatlarini elektronlashtirish bir mamlakat misolida aholiga qulayliklar yaratasa, mamlakatlarga hujjat almashinuvida tezkorlikka imkoniyat yaratadi. Bugungi maslahat kengashi ishtirokchilari ayni shu jihatga ko'proq e'tibor qarataypti.

Tadbir davomida O'zbekiston kinofotofono hujjatlari milliy arxivining 80 yilligi munosabati bilan "O'zbekiston" nashriyotida chop etilgan kitob-albom hamda O'zbekiston Kinematografiya agentligi tomonidan Ali Hamroev rejissyorligida tayyorlangan "Mangu lahzalar" hujjatli filmining taqdimoti o'tkazildi.

S.MARDIYEV.

O‘ZBEKISTON RESPUBLIKASI PREZIDENTI SHAVKAT MIRZIYOYEVNING BIRLASHGAN MILLATLAR TASHKILOTI BOSH ASSAMBLEYASINING 78-SESSIYASIDAGI NUTQI

(Davomi. Boshlanishi 1-sahifada).

Ayni paytda biz Birlashgan Millatlar Tashkiloti va uning ixtisoslashgan tuzilmalari bilan samarali hamkorlik o‘rnatish, boshqa mintaqalarning ilg‘or tajriba va yutuqlarini o‘rganishdan manfaatdormiz.

Shu munosabat bilan Birlashgan Millatlar Tashkiloti huzurida Markaziy Osiyo yoshlarini rivojlantirishga ko‘maklashish bo‘yicha ishchi guruh tashkil etishni taklif etaman. Uning doirasida “Markaziy Osiyo yoshlarining kun tartibi – 2030” dasturini ishlab chiqish maqsadga muvofiqdir.

Hurmatli delegatsiyalar rahbarlari!

Xotin-qizlarning jamiyat va davlat boshqaruvida faol ishtirok etishi bugungi kunning dolzarb masalasi. Milliy uyushtirish markazida turadigan eng ezgu maqsad – oilalar mustahkamligini, ayollarimizning huquqiy himoyasi va osoyishta hayotini ta‘minlashdan iborat.

Gender tenglikka erishish borasida ham tizimli ishlarni olib bormoqdami. Jumladan, o‘tgan yili oliy gohlarga qabul qilingan talabalarining 49 foizini qizlar tashkil etdi. Xotin-qizlarning davlat boshqaruvidagi ulushi esa birinchi marta 35 foizga yetdi. Ayollar va voyaga yetmaganlarni zo‘ravonlikdan himoya qilish maqsadida alohida qonun qabul qilindi.

Biz “Birlashgan Millatlar Tashkiloti – Xotin-qizlar” tuzilmasi bilan hamkorlikni yanada kengaytirishdan manfaatdormiz. Birgalikdagi tashabbus sifatida ayollarning buyovkorlik salohiyatini ro‘yobga chiqarish masalalarini muhokama qilish va tajriba almashish uchun kelgusi yili O‘zbekistonda Osiyo xotin-qizlari forumini o‘tkazishni taklif etamiz.

Hurmatli xonimlar va janoblari!

Hozirgi vaqtda dunyoda keskin ekologik vaziyat kuzatilmoqda. Sayyoramiz miqyosida uchta inqiroz, ya‘ni iqlim o‘zgarishi, bioxilma-xillik yo‘qolishi va atrof-muhit ifloslanishi kuchaymoqda.

Ana shunday murakkab sharoitda Orol dengizi fojiasiga qarshi kurashni davom ettirayotgan Markaziy Osiyo iqlim o‘zgarishlari oldida eng zaif mintaqalardan biriga aylanmoqda.

Global muammo bo‘lgan Orol fojiasi oqibatlarini bartaraf etish yo‘lida O‘zbekiston o‘z imkoniyatlari darajasida harakat qilmoqda. So‘nggi yillarda Orol dengizining qurigan tubida 1,7 million gektar may-

donda qurg‘oqchilikka chidamli o‘simliklardan iborat yashil hududlar barpo etildi. Bu sa‘y-harakatlari-mizni davom ettirish uchun xalqaro hamjamiyatning qo‘llab-quvvatlashi juda muhim.

Keyingi 30 yilda mintaqamizda havo harorati bir yarim gradusga ko‘tarildi. Bu – dunyodagi o‘rtacha isishdan ikki karra ko‘pdir. Oqibatda muzliklar umumiy maydonining qariyb uchdan bir qismi yo‘qolib ketdi. Ushbu tendensiya saqlanib qolsa, yaqin yigirma yilda mintaqamizdagi ikkita yirik daryo – Amudaryo va Sirdaryo oqimi 15 foizga qisqarishi mumkin. Jon boshiga suv bilan ta‘minlanish darajasi 25 foizga, qishloq xo‘jaligi ekinlari hosildorligi esa 40 foizga kamayishi kutilmoqda.

Agar o‘z vaqtida ta‘sirchan choralarni ko‘rmasak, ushbu muammolar oqibatlari mintaqamizdagi ijtimoiy-iqtisodiy barqarorlikka jiddiy putur yetkazadi.

Bu vaziyatdan kelib chiqqan holda, biz Birlashgan Millatlar Tashkiloti Bosh kotibining Suv resurslari bo‘yicha maxsus vakili lavozimi ta‘sis etilishini qo‘llab-quvvatlaymiz. Markaziy Osiyo suvni tejaydigan texnologiyalar platformasini yaratish jarayoni-da “Birlashgan Millatlar Tashkiloti – suv resurslari” mexanizmini ishga solib, eng ilg‘or texnologiyalarni jalb etish va tatbiq qilish tarafdorimiz.

Biz mintaqamizda qabul qilingan Yashil taraqqiyot dasturi doirasida tizimli hamkorlikni yo‘lga qo‘ymoqdami. Bunday sheriklik manfaatlarimizga birdek mos bo‘lib, iqlim o‘zgarishlari bilan bog‘liq tahdidlarning oldini olishga qaratilgan. Bu borada “Markaziy Osiyo iqlim muloqoti”ni joriy etishni maqsadga muvofiq, deb hisoblayman.

Biz Birlashgan Millatlar Tashkiloti Bosh Assambleyasining “Markaziy Osiyo global iqlim tahdidlari qarshisida: umumiy farovonlik yo‘lida hamjihatlik” rezolyutsiyasini qabul qilish tashabbusini ilgari suramiz. Uning asosiy mazmunini kelgusi yil Samarqandda bo‘lib o‘tadigan xalqaro iqlim forumida muhokama qilishni taklif etamiz.

Shu o‘rinda ta‘kidlashni istardimki, O‘zbekiston iqtisodiyotining asosiy tarmoqlarini iqlim o‘zgarishlariga moslashtirish, uglerod neytralligiga erishish va “yashil” energetika ulushini keskin oshirish biz uchun strategik vazifa bo‘lib qoladi.

Hurmatli yig‘ilish ishtirokchilari!

Biz ekstremizm balosi tarqalishiga, yoshlarning radikalashuviga yo‘l qo‘ymaslik uchun birgalikdagi

harakatlarimizni kuchaytirishimiz zarur.

O‘tgan yil mart oyida Toshkentda Birlashgan Millatlar Tashkilotining terrorizmga qarshi global strategiyasini Markaziy Osiyoda amalga oshirish bo‘yicha qo‘shma harakatlar rejasi qabul qilindi.

Ekstremizm va terrorizmga qarshi kurash bo‘yicha Milliy strategiyamiz doirasida bir masalaga alohida e‘tibor qaratmoqdami. U ham bo‘lsa, ilgari ekstremizm g‘oyalari ta‘sirida bo‘lgan shaxslarni sog‘lom hayotga qaytarish va jamiyatga moslashtirish masalasidir.

Biz bu borada o‘ziga xos tajriba orttirdik, besh marta “Mehr” insonparvarlik missiyasini o‘tkazdik. Uning doirasida 530 nafardan ziyod fuqarolar, avvalo, ayollar va bolalarni Yaqin Sharq va Afg‘onistondagi qurolli nizolar hududlaridan yurtimizga qaytardik. Ularning barchasiga tibbiy, psixologik, ijtimoiy va boshqa yordamlar ko‘rsatildi.

Xalqaro jamoatchilik joriy yilning iyun oyida mana shu yerda, Birlashgan Millatlar Tashkiloti bosh qarorgohida mamlakatimizga olib kelingan va yangi hayot boshlagan shaxslarning tarixini ularning o‘zlaridan eshitdi.

Biz bu yo‘nalishdagi harakatlarni davom ettirish va doimiy tajriba almashishni yo‘lga qo‘yish uchun Birlashgan Millatlar Tashkilotining Terrorizmga qarshi kurash boshqarmasi shafeligida urush hududlaridan qaytganlar bilan tizimli ishlash bo‘yicha Mintaqaviy ekspertlar kengashini tuzishga qaratilgan amaliy qadamlarni tashladik.

Birlashgan Millatlar Tashkilotiga a‘zo davlatlar xalqaro terrorizm kabi umumiy tahdidlarga qarshi kurashda yanada birlashib, harakat qilishlari kerak. Yana bir muhim fikrni ta‘kidlashni istardim. So‘nggi paytlarda ayrim mamlakatlarda ko‘zga tashlanayotgan diniy toqatsizlik, islomofobiya holatlariga aslo yo‘l qo‘yib bo‘lmaydi, deb hisoblaymiz. Jahon miqyosida dinlarning bag‘rikenglik va hamjihatlik g‘oyalarini keng targ‘ib etish maqsadida O‘zbekistonda YUNESKO shafeligida Dinlararo muloqot va bag‘rikenglik xalqaro markazini tashkil etishni taklif qilamiz.

Diyyorimiz jahon ilm-fani rivojiga beqiyos hissa qo‘shgan, islomni ilm-ma‘rifat va tinchlik dini sifatida namoyon etgan Al-Xorazmiy, Beruniy, Ibn Sino, Imom Buxoriy, Mirzo Ulug‘bek, Alisher Navoiy singari ulug‘ alloma va mutafakkirlar vatani ekani bilan haqli

ravishda faxrlanamiz. Shunday buyuk olimlarning boy merosini o‘rganish, islomning asl insonparvarlik mohiyatini chuqur ochib berish maqsadida 2024-yil O‘zbekistonda “Islom – tinchlik va ezigulik dini” mavzusida xalqaro konferensiya o‘tkazish tashabbusini ilgari suramiz.

Hurmatli sessiya ishtirokchilari!

Xalqaro xavfsizlik Afg‘onistondagi jarayonlar bilan bevosita bog‘liqdir. Ushbu mamlakatda yangi vaziyat vujudga kelgan bo‘lib, u afg‘on masalasini hal etishda o‘ziga xos yondashuvlarni talab etmoqda.

Afg‘onistonni o‘z muammolari bilan yana yolg‘iz qoldirish – bu katta xato bo‘ladi. Inkori qilish, yakalab qo‘yish va sanksiyalar qo‘llash oddiy afg‘on xalqining ahvolini yanada og‘irlashtirmoqda.

Afg‘on xalqiga insonparvarlik yordami ko‘rsatishni susaytirmaslik lozim, deb hisoblaymiz. Afg‘onistonning muzlatilgan xalqaro aktivlarini bu yurtdagi o‘tkir ijtimoiy muammolarni hal etishga yo‘naltirish uchun maqbul mexanizmlarni ishlab chiqishga chaqiramiz. Bizga tinch va barqaror, mintaqaviy hamkorlik jarayonlarida ishtirok etadigan, qo‘shnilari va boshqa mamlakatlar bilan o‘zaro manfaatli sheriklik uchun ochiq Afg‘oniston kerak.

Men bugun ushbu nufuzli minbardan turib, dunyo hamjamiyatini Afg‘oniston muammosini hal etish yo‘lida birlashishga chaqiraman. Bu borada Birlashgan Millatlar Tashkiloti rahnamoligida Afg‘oniston bo‘yicha birgalikda ishlab chiqilgan, vaziyatga moslashuvchan va konstruktiv pozitsiyani belgilash prinsipial jihatdan muhim, deb hisoblayman.

Hurmatli rais!

Hurmatli anjuman qatnashchilari!

Biz barchamiz hozirgi tarixiy tub burilish pallasida kelgusi avlodlarga sayyoramizni qanday holda qoldirish haqida o‘ylashimiz lozim.

Mustahkam tinchlik va farovonlikka faqat umumiy intilishlar va birgalikdagi harakatlar bilan erishish mumkin. Bizga o‘zaro ishonch, birdamlik va hamkorlik ruhi har qachongidan ham ko‘proq zarur.

So‘zimizning yakunida O‘zbekiston shu yo‘lida Birlashgan Millatlar Tashkiloti institutlari va barcha davlatlar bilan keng ko‘lamli va uzoq muddatli sheriklikni chuqurlashtirishga tayyor ekanini yana bir bor ta‘kidlamoqchiman.

E‘tiboringiz uchun rahmat.

Yangi O‘zbekistonning 2022-2026-yillarga mo‘ljallangan taraqqiyot strategiyasida asosiy e‘tiborlardan bir yo‘nalishi “Yashil iqtisodiyot”ni shakllantirish va rivojlantirishga bag‘ishlanadi. Ushbu strategiyani amalga oshirish natijasida issiqxona gazlarining yalpi ichki mahsulot birligiga nisbatan solishtirma ajratmalari 2010-yildagiga nisbatan 10 foizga qisqartiriladi. Gazning bunday ishlardan tejalishi aholiga gazni yetkazib berish imkoniyatini oshiradi.

Mazkur strategiyaning amalga oshirilishi natijasida 100 foizgacha aholi va iqtisodiyot tarmoqlari zamonaviy, arzon va ishonchli energiyadan foydalanish imkoniyati bilan ta‘minlanadi. Bundan tashqari, ekologik jihatdan yaxshilangan motor yo‘qilg‘isi va avtomobillar ishlab chiqarish va ulardan foydalanish kengaytiriladi, elektr transporti rivojlantiriladi. Demak, mamlakatimiz kelajagi bevosita “Yashil iqtisodiyot”ni shakllantirish bilan bog‘liqdir.

Yashil iqtisodiyot iqtisodiyot fanlarining bir yo‘nalishi sifatida o‘tgan asrning oxirida paydo bo‘lgan edi. Mazkur iqtisodiyot tabiiy muhitning tarkibiy qismi bo‘lib, uning bir yo‘nalishi hisoblanadi. Yashil iqtisodiyot tushunchasi iqtisodiy fanlar va falsafaning yo‘naltiruvchi sohalaridagi g‘oyalarni o‘z ichiga oladigan tabiat va jamiyat bilan bog‘liq ekologik iqtisodiyot, atrof-muhit iqtisodiyoti, resurslarga asoslangan iqtisodiyot, aholining rivojlanishi, feminizm iqtisodiyoti kabi yashil siyosat bilan bog‘liq iqtisodiyotni o‘z ichiga oladi.

Yashil iqtisodiyot bu iqtisodiy tizim bo‘lib, uning asosiy maqsadi sayyora-mizning ekologiyasi va uni saqlab qolish bilan birga, iqtisodiyotning barcha sohalarini faol omillar evaziga rivojlantirishga qaratilgan. Shunday qilib, ushbu tushunchaga quyidagicha ta‘rif berishni maqsadga muvofiq, deb topdik. **Yashil iqtisodiyot deganda, inson hayoti va sog‘lig‘i uchun zarur bo‘lgan resurslarni, atrof-muhit va ekologiyani bir butun holda saqlab qolib, ishlab chiqarish va xizmat ko‘rsatish sohalari bilan bog‘liq iqtisodiyotni yanada rivojlantirishni amalga oshirishga**



IQTISODIYOT NIMA?

asoslangan iqtisodiy faoliyatning yangi yo‘nalishi tushuniladi.

Bunda quyidagi tadbirlarni amalga oshirish lozim bo‘ladi.

Birinchidan, aholining ehtiyojlarini qondirib, ularning farovonligi, yashash darajasi va sifatini oshirish uchun moddiy ne‘matlarni yaratishni barqaror ravishda ekologiya va atrof-muhitga zarar yetkazmasdan ko‘paytirib borish lozim bo‘ladi. Bunda asosiy e‘tiborni iqtisodiyotda energiya samaradorligini oshirish va tabiiy resurslardan oqilona foydalanishga qarata maqsadga muvofiq.

Ikkinchidan, ishlab chiqarish va iqtisodiyotni rivojlantirishga energiya resurslarini qayta tiklanadigan energiya manbalari hisobidan ko‘paytirish, jamoat transportini ham elektr quvvati bilan yuradiganlariga almashtirish, energiyani tejaydigan binolarni barpo qilish kabi yo‘nalishlarda ishlarni olib borish ko‘zda tutilgan. Bunda iqlim va ekologiya barqarorligiga imkon beruvchi mustahkam iqtisodiy taraqqiyotga erishish choralarni ko‘rish ham muhim vazifalar sirasiga kiradi.

Uchinchidan, atrof-muhitga zararli gazlarni chiqarmaydigan, atrof-muhitni asraydigan, ekologik toza texnologiyalarni yaratish orqali ekologik toza mahsulotlarni yetishtirish masalasiga ham alohida ahamiyat berish lozim bo‘ladi. Bunda texnologik modernizatsiyalash va moliyaviy mexanizmlarni rivojlantirish orqali iqtisodi-

yotning energiya samaradorligini oshirish va tabiiy resurslardan oqilona foydalanish yo‘llarini ishlab chiqish maqsadga muvofiq. Bunda davlat investitsiyalari va xarajatlari-ning ustuvor yo‘nalishlariga ilg‘or xalqaro standartlarga asoslangan “yashil” mezonlarni kiritish ham lozim bo‘ladi.

To‘rtinchidan, bir tomondan, tabiatdagi barcha resurslar cheklangan bir paytda inson ehtiyojlari cheksizligini inobatga olib, ularning muvofiqligini ta‘minlash maqsadida ne‘matlarni ishlab chiqarishni kengaytirishni tabiiy resurslarni kamaytirmasdan amalga oshirish, Orolbo‘yidagi ekologik inqirozning salbiy ta‘sirini yumshatish choralarini ko‘rish.

Beshinchidan, aholining doimiy o‘sib borayotgan ehtiyojlarini qondirish uchun qancha ishlab chiqarish, qanday ishlab chiqarish, kimga va qaysi hududga mo‘ljallab ishlab chiqarish masalasiga atrof-muhitni asragan holda katta ahamiyat beriladi. Ushbu sohada davlat tomonidan rag‘batlantirish mexanizmlarini, davlat-xususiy sherikligini rivojlantirish hamda xalqaro moliyaviy institutlar bilan hamkorlikni faollashtirish maqsadga muvofiq. Endi “yashil iqtisodiyot”ga o‘tish yo‘nalishlari bo‘yicha tajriba-sinov loyihalarini amalga oshirib, ularning murakkab yo‘nalishlarini joriy qilishga ko‘maklashish zarur.

Oltinchidan, “yashil iqtisodiyot” sohasida, yuqori samaradorlikka erishish uchun xorijiy davlatlar bilan ikki tomon-

lama va ko‘p tomonlama shartnomalar tuzish orqali xalqaro hamkorlikni mustahkamlash. Bunda “yashil iqtisodiyot”ni takomillashtirish bo‘yicha tajribalar bilan o‘rtoqlashish va shu sohaga yo‘naltiriladigan maqsadli investitsiyalarni jalb qilish.

Yettinchidan, “yashil iqtisodiyot”ni shakllantirish va uni rivojlantirish uchun shu sohani yuritadigan kadrlarni ham shakllantirish maqsadga muvofiq. Mazkur yo‘nalish bo‘yicha ta‘limga investitsiyalar kiritishni rag‘batlantirish, yetakchi xorijiy ta‘lim muassasalari va ilmiy-tadqiqot markazlari bilan hamkorlikni rivojlantirish o‘ta dolzarb masalalardan biri hisoblanadi. Shuningdek, «yashil iqtisodiyot»dagi mehnat bozori bilan bog‘liq kadrlarni tayyorlash va qayta tayyorlash tizimini ham yo‘lga qo‘yish.

Sakkizinchidan, tan olib aytish kerak, ayrim hollarda tabiatga va jamiyatga tiklab bo‘lmaz darajada zarar yetkazilmoqda. Hududlarda, ayniqsa, yirik shaharlarda havo ifloslanishi bo‘yicha holat tobora yomonlashib bormoqda. Bu bevosita aholining bu masalaga mas‘uliyatsizlik bilan qarashi tufayli ro‘y bermoqda. Buni inobatga olib, ekologiya va atrof-muhitga zarar yetkazish bilan bog‘liq jinoyatlar og‘ir jinoyatlar toifasiga kiritilishi lozimligi ta‘kidlandi. Bu bo‘yicha Prezidentimizning 2023-yil 31-maydagi “Ekologiya va atrof-muhitni muhofaza qilish sohasini transformatsiya qilish va vakolatli davlat organi faoliyatini tashkil etish chora-tadbirlari to‘g‘risida”gi farmonida qayd etildi.

To‘qqizinchidan, mamlakatimizning barcha hududlarida atmosferaga chiqariladigan tashlanmalarning yukini kamaytirish bo‘yicha tizimli ishlarni yo‘lga qo‘yish lozim bo‘lmoqda. Chunki daraxtlar va butalar kesilishiga moral-toriy e‘lon qilingan bo‘lishiga qaramay, 44 mingtaga yaqin, shundan, 9,5 mingtaga yaqin qimmatbaho daraxt noqonuniy kesilgan. Oqibatda tabiatga 36 milliard so‘mlik zarar yetkazilgan. 2022-yilda ekologik huquqbuzarliklar yuzasidan 27 holat bo‘yicha jinoiy ish qo‘zg‘atilgan. Biroq ularning barchasi bo‘yicha yengil moliyaviy jarima jazosi qo‘llanilgan, xolos. Bejiz ekologiya va atrof-muhitga zarar yetkazish bilan bog‘liq jinoyatlar og‘ir jinoyatlar toifasiga kiritilishi ko‘zda tutilgan emas.

O‘ninchidan, shuni tan olib aytish joizki, yer, yer osti boyliklari, suv, o‘simlik

Mulohaza va taklif

va hayvonot dunyosi hamda boshqa tabiiy zaxiralar insoniyatga Alloh tomonidan in‘om qilingan bebaho ne‘matlardir. Shu tufayli ularga umummilliy boylik sifatida qaraladi. Ushbu boyliklar davlat muhofazasida ekanligi alohida qonun bilan belgilab qo‘yilgan. Mamlakat miqyosida “Yashil makon” umummilliy loyihasi doirasida o‘rmon fondiga kirmaydigan daraxtlar qimmatbaho navlarini kesishga muddatsiz moratoriy joriy etildi.

O‘n birinchidan, “yashil iqtisodiyot” – mamlakatimiz kelajagini belgilovchi muhim yo‘nalish ekanligini inobatga olib, ushbu sohada huquqbuzarliklarning oldini olish, ekologik madaniyatni yanada oshirish bo‘yicha ta‘sirchan tashviqot-targ‘ibot ishlarini olib borish lozim bo‘lmoqda. Bu birlamchi vazifa sifatida maxsus vakolatli davlat organlariga yuklatilgan. Ammo bu yetarli emas, bu ishda har bir fuqaro ishtirokini ta‘minlash zarur. Ekologiyani buzish bilan bog‘liq bo‘lgan jinoyatlarning odilona jazosini ta‘minlashda sudlar bilan bog‘liq ishlarni to‘g‘ri tashkil etish ham muhim. Hozirgidek biroq jarima bilan cheklanib qolmasdan, kattaroq jinoiy javobgarlikka tortilish masalasini ham belgilash maqsadga muvofiq. Chunki ekologiya va atrof-muhitga zarar yetkazish, o‘simlik va hayvonot dunyosi ob‘ektlarini nobud qilish yoki ularga shikast yetkazish bilan bog‘liq jinoyatlar og‘ir jinoyatlar toifasiga kiritilishi lozim, deb hisoblaymiz.

“Yashil iqtisodiyot” bu iqtisodiy tizim bo‘lib, uning asosiy maqsadi sayyora-mizning ekologiyasi va uni saqlab qolish bilan birga, iqtisodiyotning barcha sohalarini faol omillar evaziga rivojlantirishga qaratilgan. Bundan tashqari, “yashil iqtisodiyot”da inson, tabiat va iqtisodiyotning bir-biri bilan uyg‘un va barqaror rivojlantirishni ta‘minlagan holda harakat qilish lozim bo‘ladi. Masalan, uy quraman, deb daraxtlar ayovsiz kesib tashlanmaydi, texnologiyalarni ko‘paytirish havo atmosfera-sini zaharli gazlar bilan to‘ldirish evaziga amalga oshirilmaydi va h.k. Shu yo‘l bilan barqaror taraqqiyotga erishish bugungi kundagi global masalalardan biridir.

Mamayunus PARDAYEV, Murod MUHAMMEDOV, Samarqand iqtisodiyot va servis instituti professorlari, iqtisodiyot fanlari doktorlari.



Adolatli va zamonaviy davlat

barpo etish asosiy maqsad

Davlat rahbarining tegishli farmoni bilan Yangi O'zbekiston taraqqiyot strategiyasini amalga oshirish jarayonida orttirilgan tajriba va jamoatchilik muhokamasi natijalari asosida ishlab chiqilgan "O'zbekiston – 2030" strategiyasi tasdiqlandi.

Strategiyada quyidagi asosiy g'oyalarni aks ettirilgan:

barqaror iqtisodiy o'sish orqali daromadi o'rtachadan yuqori bo'lgan davlatlar qatoridan o'rin olish; aholi talablariga va xalqaro standartlarga to'liq javob beradigan ta'lim, tibbiyot va ijtimoiy himoya tizimini tashkil qilish; aholi uchun qulay ekologik sharoitlarni yaratish; xalq xizmatidagi adolatli va zamonaviy davlatni barpo etish; mamlakatning suvereniteti va xavfsizligini kafolatli ta'minlash.

Ahamiyatli jihati, strategiyaning 85-maqsadida sudning mustaqilligini kuchaytirish va suddagi ochiqlikni ta'minlash orqali odil sudlovga erishish darajasini oshirish eng ustuvor maqsadlardan biri sifatida qo'yilmoqda. Va, bunda alohida vazifa sifatida Jahon odil sudlov loyihasining Huquq ustuvorligi indeksi bo'yicha 0,64 balni to'plashga erishish belgilangan.

Birgina shu misolning o'zi xalq xizmatidagi adolatli va zamonaviy davlatni barpo etish qog'ozdagi gap, balanparvoz maqsad emasligini isbotlab turibdi.

Farmon bilan strategiyani amalga oshirish va maqsadli ko'rsatkichlar-

ga erishish barcha davlat organlari va tashkilotlari faoliyatida eng ustuvor vazifa etib belgilandi hamda bu bo'yicha ularning birinchi rahbarlariga shaxsiy mas'uliyat yuklandi.

Asosiysi, jarayon yuzasidan samarali jamoatchilik nazoratini o'rnatishga ham alohida ahamiyat qaratilgan. Buning uchun "O'zbekiston – 2030" strategiyasi ijrosining ta'minlanish darajasi, unda belgilangan islohotlarning sifatli amalga oshirilishini aholi tomonidan har bir maqsad va undagi ko'rsatkichlar kesimida baholash, ular yuzasidan o'z fikrlarini qoldirish va tashabbuslar bildirish imkoniyatini yaratuvchi onlayn portal ishga tushiriladi.

Har oyda baholash natijalari va aholidan kelib tushadigan fikr-mulohazalar umumlashtirilib, respublika komissiyasiga taqdim etib boriladi. Komissiya o'z navbatida har yarim yilda O'zbekiston Respublikasi Prezidentiga axborot kiritadi.

Maqsad ulkan, unga eltuvchi yo'lni aniq, endi vaqt hammasiga oydinlik kiritadi.

Begench ESHQUVATOV,
fuqarolik ishlari bo'yicha
Samarqand shahar sudi
sudyasi.

Darvozamiz qarshisida tibbiyot punkti

Farzandlarimizning issig'i oshsa, nima qilishimizni bilmay qolardik. Tuman markaziga borish uchun ulov muammo bo'lgani uchun ularni yelkalab, 5-6 kilometr olisda joylashgan qo'shni mahalladagi qishloq vrachlik punktiga borardik. Keksalarimizning qon bosimi oshib ketsa, chaqirilgan tez yordam mashinasining yo'liga soatlab ko'z tikkan kunlarimiz bo'lgan.

Beshkuviliklar o'tmishini shunday xotirlaydi. Bugungi kunda yaratilayotgan sharoitlar uchun shukronalar aytadi.

Ko'pgina qiyinchiliklar ortda qoldi, deydi 75 yoshli onaxon Rahima Sulaymonova. – Bugun darvozamizdan ko'chaga chiqsak, qarshimizda mahalla tibbiyot punkti. Ertalabdan kechgacha shifokor va hamshiralar aholi xizmatida. Mo'jazgina punktda bemorlar kunduzi yotib davolanishi uchun ham sharoit yaratilgan. Kechalari zarur bo'lsa, chaqirilgan tez tibbiy yordam mashinalari ham 10-15 daqiqada yetib kelyapti. Muhimi, shifokorlar bizning tibbiy

madaniyatimiz yuksalishiga ham yordam berishyapti.

Ikki xonadan iborat tibbiyot punktimizda zarur sharoitlar yaratilgan, deydi shifokor Gulnoza Lapasova. – Bu yerda men va ikki nafar patronaj, bir nafar amaliyotchi hamshira hududdagi 2270 nafar aholiga tibbiy xizmat ko'rsatib kelyapmiz. Yilning har choragida viloyat va tuman markazida faoliyat olib borayotgan malakali tor ixtisosli mutaxassislar tomonidan chuqurlashtirilgan tibbiy ko'riklar o'tkazib kelinmoqda.


2022-yilda viloyat sog'liqni saqlash boshqarmasi tomonidan Bulung'ur tumani-ga 5 ta tibbiyot punkti uchun konteynerlar keltirildi. Ular tumanning Beshkuv, Chorbog', Xo'jamazgil, Nebo'sa va Oqtosh mahallalariga o'rnatildi. Shuningdek, respublika Sog'liqni saqlash vazirligi tomonidan keltirilgan 6 dona konteyner G'o'bdin, Lalmikor, Olmazor, Yangiobod va Mirzaariq mahallalariga joylashtirildi.

Bu tibbiy punktlarni o'rnatish va atrofini obodonlashtirish uchun tuman mahalliy budjetidan 275 million so'm mablag' ajratildi, deydi tuman tibbiyot birlashmasi boshlig'i o'rinbosari Najmiddin Qorjovov. – Ularning o'rnatilishi va faoliyat boshlashi olis hududlarda yashovchi aholining uzog'ini yaqin, og'irini yengil qildi. Birgina



misol, shu paytgacha qadar Qorovultepa mahallasi aholi tibbiy xizmatga muhtoj bo'ladigan bo'lsa, G'o'bdin mahallasidagi qishloq oilaviy shifokorlik punktiga 12 kilometr, tuman markazidagi tibbiyot muassasalariga esa qariyb 30 kilometr yo'l bosib o'tishi kerak bo'lgan.

To'liqin SIDDIQOV,
Baxtiyor MUSTANOV (surat).



Ikki davlat rahbarlarining sa'y-harakatlari tufayli keyingi yillarda O'zbekiston va Janubiy Koreya o'rtasida ko'p tomonlama hamkorlik aloqalari tobora mustahkamlanib bormoqda.

Joriy yilning 12, 14, 16-sentabr kunlari Samarqand davlat iqtisodiyot va servis instituti qoshidagi King Sejong markazida "Sejong madaniyat akademiyasi" tadbiri bo'lib o'tdi.

Ushbu tadbirda Koreya madaniyati bilan bevosita tanishuvchilar uchun uch xil dastur tayyorlandi. Bular - xattotlik, hanji-koreys milliy qog'ozini tayyorlash, shuningdek, K-beauty, ya'ni koreys go'zallik darslari kabi yo'nalishlardir. Buning uchun Janubiy Koreya davlatidan ushbu sohalar bo'yicha mutaxassislar taklif qilindi va o'quvchilar to'g'ridan-to'g'ri Koreyaning milliy va zamonaviy madaniyati bilan tanishib, uni yaqindan his qila olish imkoniyatiga ega bo'lishdi.

Koreys

TILINI O'RGANAMIZ

– "Sejong madaniyat akademiyasi" tadbiri orqali o'quvchilarning Koreya madaniyatiga qiziqishi juda yuqori ekanligining guvohi bo'ldim, deydi Samarqand Sejong markazi rahbari janob Lee Jong Hyuk. – Mahalliy aholining shu darajadagi qiziqishi tufayli nafaqat koreys tili, balki Koreya madaniyatini o'rganish imkoniyati endilikda bundan-da kengayib boraveradi.

Sejong instituti butun dunyoda koreys tili va koreys madaniyatini o'rganmoqchi bo'lgan o'quvchilar uchun Koreyaning Madaniyat, sport va turizm vazirligi tomonidan qo'llab-quvvatlanib kelinayotgan tashkilot bo'lib, ayni vaqtda dunyoning 85 davlatida ushbu institutning 248 ta markazi mavjud. Samarqand shahrida joylashgan Sejong markazi Janubiy Koreyaning Woosok universiteti hamda Samarqand davlat iqtisodiyot va servis instituti bilan hamkorlikda 2022-yilning fevral oyida rasmiy ravishda faoliyat yuritish boshlagan edi.

Institut koreys tilini o'rganishga qiziquvchilarni taklif etadi.
Yormamat RUSTAMOV.

REKLAMA, E'LOMLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tezkor, samarali va hamyonbop / MUHOJAAT UCHUN TELEFON: 66-233-91-56

TANLOVDA QATNASHING!

Muhammad Al-Xorazmiy nomidagi Toshkent axborot texnologiyalari universiteti Samarqand filiali quyidagi kafedralar bo'yicha bo'sh lavozimlarga tanlov e'lon qiladi:

I. "Kompyuter injiniring" fakulteti bo'yicha

1. "Kompyuter tizimlari" kafedrasiga:

- dotsent - 1 o'rin.

2. "Tabiiy fanlar" kafedrasiga:

- dotsent - 1 o'rin;

- katta o'qituvchi - 1 o'rin.

II. "Telekommunikatsiya texnologiyalari va kasb ta'limi" fakulteti bo'yicha:

1. "Axborot ta'lim texnologiyalari" kafedrasiga:

- dotsent - 1 o'rin.

2. "Telekommunikatsiya injiniringi" kafedrasiga:

- assistent - 1 o'rin.

3. "Axborot xavfsizligi" kafedrasiga:

- katta o'qituvchi - 1 o'rin;

- assistent - 1 o'rin.

4. "Tillar" kafedrasiga:

- katta o'qituvchi - 1 o'rin.

Tanlovda qatnashish uchun quyidagi hujjatlar taqdim etiladi:

- filial direktori nomiga ariza;

- xodimlar hisobi bo'yicha shaxsiy varaqa;

- oliy ma'lumot, ilmiy daraja haqidagi diplomlarning nusxalari;

- ilmiy unvoni haqidagi attestatning nusxasi;

- ilmiy va uslubiy ishlarning ro'yxati.

Manzil: Samarqand shahri Ibn Sino ko'chasi, 2-uy.

Murojaat uchun telefonlar:

+99866-232-29-29,

+99866-232-20-37.

TANLOV O'TKAZILADI!

Jismoniy tarbiya va sport bo'yicha mutaxassislarni qayta tayyorlash va malakasini oshirish instituti Samarqand filiali quyidagi lavozimlarga tanlov e'lon qiladi:

Kafedra mudiri lavozimiga:

"Sport psixologiyasi, ijtimoiy-tabiiy fanlar" kafedrasiga.

O'qituvchi lavozimiga:

"Jismoniy tarbiya, sport nazariyasi va uslubiyati" kafedrasiga.

Tanlovda ishtirok etishni istaganlar quyidagi hujjatlarni taqdim etadilar:

- filial direktori nomiga ariza;

- yashash joyi ko'rsatilgan pasport nusxasi;

- kadrlarni qayd qilish shaxsiy varaqasi;

- oliy ma'lumot haqidagi diplom nusxasi;

- qatnashuvchilarda ilmiy daraja, ilmiy

unvon, shuningdek, ilmiy ishlar va ixtirolar mavjud bo'lgan taqdirda, ularga tegishli diplomlar, attestatlar nusxalarini, malaka oshirish haqidagi sertifikatlarni taqdim etishlari kerak.

Eslatma: Tanlovda ishtirok etish uchun arizalar e'lon chop etilgan kundan boshlab bir oy davomida qabul qilinadi.

Manzil: Samarqand shahri Cho'ponota ko'chasi, 13-"A" uy.

Murojaat uchun telefonlar:

+99866-236-21-28,

+99893-357-74-95.

e-mail: minsport_markaz_sf@umail.uz

BEKOR QILINADI

Toyloq tumanidagi "SAMARKAND BEST BROKER" mas'uliyati cheklangan jamiyatining (STIR: 307218956) dumaloq muhri va burchak tamg'asi yo'qolganligi sababli bekor qilinadi.

Nurobod tumanidagi "NURBULOQ OMONOTAR SIXATGOHI" mas'uliyati cheklangan jamiyatining (STIR: 310039736) dumaloq muhri va burchak tamg'asi yo'qolganligi sababli bekor qilinadi.

TOPGANGA MUKOFOT!

Fuqaro Umarov Saidmurod Azamovichning "BSD" toifali haydovchilik guvoohnomasi (AF 1149633, 29.10.2019 yilda Samarqand viloyat IIB JXX YHXB TRO' va IOBdan berilgan) Jomboy tumani hududida tushirib qoldirilgan. Ushbu hujjatni topganlardan mukofot evaziga qaytarishlarini so'raymiz.

Telefon:

+99890-475-27-77.

DA'VOLAR BO'LSA...

Samarqand shahrida xususiy amaliyot bilan shug'ullanuvchi notarius Nurqosimov Jamshid Sayfiddinovich notarial idorasida marhum Arifov Dilyaver Rustemovichga (2023-yil 12-martda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Nurqosimov Jamshid Sayfiddinovich notarial idorasiga murojaat etishlarini so'raymiz.

Manzil: Samarqand shahri Panjob ko'chasi, 4-uy.

Narpay tumanida xususiy amaliyot bilan shug'ullanuvchi notarius Qurbonov Azizjon Ro'ziyevich notarial idorasida marhum Kuvondikov Xamdu'llaga (2022-yil 6-iyulda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Qurbonov Azizjon

Ro'ziyevich notarial idorasiga murojaat etishlarini so'raymiz.

Manzil: Narpay tumani Oqtosh shahri, Imom Buxoriy ko'chasi.

Samarqand shahrida xususiy amaliyot bilan shug'ullanuvchi notarius Aliyeva Lola Zoirovna notarial idorasida marhum Shakirov Djamshidjon Zakirovichga (2015-yil 11-iyunda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Aliyeva Lola Zoirovna notarial idorasiga murojaat etishlarini so'raymiz.

Manzil: Samarqand shahri Mirzo Ulug'bek ko'chasi, 80-uy.

Samarqand shahrida xususiy amaliyot bilan shug'ullanuvchi notarius Tursunov Suhrob Berdiqulovich notarial idorasida marhum Kurbanov Sabirga (1999-yil 16-avgustda vafot etgan) tegishli mol-

mulk uchun meros ishi ochilmoqda. Shu munosabat bilan merosxo'rlarning Tursunov Suhrob Berdiqulovich notarial idorasiga murojaat etishlarini so'raymiz.

Manzil: Samarqand shahri Beruniy ko'chasi, 200-uy, 3-xona.

Payariq tumanida xususiy amaliyot bilan shug'ullanuvchi notarius Toshtemirov Alisher Po'latovich notarial idorasida marhum Karshiyev Zokirjon Qo'ziboyevichga (2005-yil 10-noyabrda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Toshtemirov Alisher Po'latovich notarial idorasiga murojaat etishlarini so'raymiz.

Manzil: Payariq tumani Chelak shaharchasi, Obod ko'chasi, 35-uy, 3-xona.

Samarqand shahrida xususiy amaliyot bilan shug'ullanuvchi notarius Hazratqulov Mahmud Mo'minqulovich notarial

Mulohaza uchun mavzu



RO'ZG'OR —
AYOLNING IJODIY "ASARI"

Yozning jazirasidan qizigan yer hovurini, changini bosish maqsadida ko'p qavatli uy yo'laklariga har kun kechqurun suv sepiladi, supuriladi. Xotin-xalajning bari ko'chada. Uy oldidagi o'rindiqla 4-5 ayol gapxona qurib o'tiribdi. Lekin ulardan ikkisini bu yerda deyarli har kuni, ertalabdan kechgacha "gap sotib" o'tirganini ko'rish mumkin.

Bir kuni chidolmadim, yana xafa qilib qo'ymay deb, iloji boricha yumshoqroq ohangda qiziqib so'radim: "Sizlarga odamning "havasi" keladi, uyda qiladigan ishingiz yo'qdek go'yo?". "Uydami, qizlar bor (ular 10-11 yoshda), barcha yumushni qilib o'tirishadi", dedi ulardan biri mamnun jilmayib.

O'ylab qolasan kishi. Ular uy yumushlarini bajarishga qanday vaqt toparkan, qizlariga uy-ro'zg'or tutumiyu tartibini, yaxshi urf-odat va tarbiyani qachon o'rgatarkan?

Yana bir boshqasi esa uning butunlay teskarisi: kim bilandir uzoq vaqt gaplashib turganini ko'rmaysiz. Uy-ro'zg'or yumushi, farzand tarbiyasidan ortmaydi. Ayolning sarishtasi — ro'zg'orning farishtasi, deganlaridek, uyi ham risoladagidek, toza-ozoda, tartibli...

Uyda tartib, tozalik bo'lsa, baraka inadi. Qadimda ota-bobolarimiz "Toza-ozoda joy - farishtali joy", deb bejiz aytishmagan. Ular chiqindi, shamma, kul, mag'zava, soch-soqolni har joyga tashlashni bexosiyat, uvul, deb bilishgan. Aslida esa o'sha paytlaridayoq mag'zava yoki kul ekologiyaga zarar yetkazishini anglashgan. Shu orqali atrofdagilarni tozalikka, sarishtalikka chorlagan.

Hozir-chi? Ayniqsa, yangi qurilgan uylar atrofini ko'rib ta'bingiz xira bo'ladi. Ular uyi atrofini supurishga, eshigi osti - bo'sag'asini yuvib tozalashga hafসা qilmaydi. O'zi istiqomat qilayotgan joyni shunday saqlagan odamning uy-ro'zg'or tutumi, farzandga ibratini tasavvur qilavering.

Mashhur ingliz yozuvchi va dramaturgi Agata Kristi aytganidek, uy - bu ayolning katta bir ijodiy "asari", u ayol va uning oilasi uchun asosiy kuch va ilhom manbai bo'lishi kerak. Bu "asar" ko'zgu misoli. U qanday yashayotganingiz, tartib-intizomingiz, nimani his qilayotganingizni aniq aks ettiradi.

Haqiqiy ayol uyni ko'rkamlashdan erinmaydi, u uyning farroshi emas, balki bekasi bo'lishi kerak. Bunday uy, albatta, harorat, yorug'lik, xotirjamlik, baxt va quvonch baxsh etishi begumon.

Gulnora XOLDOROVA.

Maqom ilmini puxta egalagan, nozik didli ijodkor O'ktam Yahyoyev 1955-yil Samarqand shahrida tug'ilgan. Yoshlik chog'idanoq o'zbek milliy cholg'ularini ijro etishga bo'lgan qiziqishi uni 1973-yil Samarqand davlat pedagogika institutining musiqa va ashula fakulteti-ga yetakladi.

Oliyohda ustozlaridan sozandalik sirlarini qunt bilan o'rgandi. Talabalar ichida o'z iste'dodi bilan ajralib turgan O'ktam ustozlari e'tiboriga tushdi. Ularning tavsiyasi va maslahati bilan 1977-yildan o'zi o'qigan institutda o'qituvchi bo'lib ishlay boshladi. Bu yerda katta tajriba orttirgan O'ktam Yahyoyev keyinchalik Samarqand tumanidagi 2-umumta'lim maktabida, Samarqand shahar 10-mehribonlik uyida,



Samarqand shahar 3-bolalar musiqa va san'at maktabida yoshlarga musiqa ilmidan saboq berdi.

U ta'lim dargohlarida yoshlarga saboq berish bilan birga o'z ustida ishlab, xalq og'zaki ijodi bo'yicha bilimlarini mustahkamlab bordi. Ijodkor xalq merosiga aylangan mumtoz ashulalarga musiqa basta-

Yonimizdagi odamlar

MUMTOZ
MUSIQAMIZ BILIMDONI

ladi. Uning repertuaridan "Oqibat" (Nodira g'azali, Fattoh Mamadaliyev musiqasi), Rost maqomidan "Yod aylasa" (Navoyi g'azali), "Tanovor" (xalq musiqasi), "Jonimga jono" (Jamol Kamol she'ri), "Dilrabo o'zingiz", "Qadimiy ushshoq" (Furqat g'azali, Fattoh Mamadaliyev musiqasi), "Bul menga mahbub" (Faxriddin Sodiqov musiqasi) kabi mohirona, maromida ijro etilgan ijod namunalari o'rin olgan.

O'ktam Yahyoyev ijro uslubi vazminligi, lirikaga moyilligi, ovoz va cholg'u mutanosibligi bilan ajralib turadi. U respublika televideniya-sining musiqiy ko'rsatuvlarida, tele-dasturlarida faol qatnashib kelgan va uning ijrosidagi qo'shiqlar

telekanal arxivida hamda 20 ga yaqin qo'shiqlari respublika radiosi-ning musiqiy eshittirishlar redak-siyasida saqlanmoqda. San'atkor yuzlab shogirdlarning ustoz. Hozir ham ustoz-shogird an'analarini davom ettirib, ustozlaridan o'rgan-gan bilimni hamda yillar davomida orttirgan tajribasini shogirdlariga o'rgatib kelmoqda.

Bog'bonning yaratgan bog'i in-sonlar qalbiga sokinlik baxsh etgani kabi ijodkor O'ktam Yahyoyev ijro etgan kuy-qo'shiqlar ham xalq qal-bini xushnud etadi.

Ismoil HUSAINOV,
Samarqand shahar
3-bolalar musiqa va san'at
maktabi direktori.



QO'SHIQ

YOXUD YURAKLARNI SEL
QILIB, KO'NGILLARNI GUL
QILIB KUYLAB O'TDI BIR HOFIZ

Hech bir mubolag'asiz aytish mumkinki, qo'shiq hasrat, nadomat, mung va qayg'u, dard-alamning, ayni vaqtda shodlik, quvonch, orzu-istaklarning, eng nafis, eng ixcham va eng ta'sirchan sadosidir. Ana shu sado oltmish yil davomida yonib-jo'shib jaranglab turdi o'zbek diyorida. Nafaqat yurtimiz, balki Markaziy Osiyo, Yaqin Sharq davlatlarining baland sahnalarida, izdihom qay-nagan katta-katta maydonlarida, hatto okeanorti davlatlarida ham sevgi-mu-habbat, tinchlik va do'stlik, mehnat va shodlikni tarannum etuvchi qo'shiqlari sarhadlar oshib o'tdi.

Endi esa ana shu otashqalb san'atkor, sohirnafas qo'shiqchi, O'zbekiston xalq artisti Sherali Jo'rayev oramizda yo'q. Bunga tilim bormaydi, qalam titraydi. Ammo o'lim haq.

"Onaginam", "Birinchi mu-habbatim", "Bog'bon qizi", "Qo'llar", "Bobo dehqon" kabi yuzlab o'lmas qo'shiqlar ijrochisi edi u, tom ma'noda muhabbat kuychisi edi.

"Uxlasin", "Karvon ko'rdim", "Tushimda ko'rsam edi",

"Oshiqlar sardori"... Bu qo'shiqlar yurtimizning har bir go'shasida, har bir xonadonda yangrab ke-layotir. Ana shu qo'shiqlar qalblar qatiga singib ketgan axir.

Zamonamizga shukrona-lik, faxr-iftixor va quvonch ufurib turuvchi "O'zbekim", "Zamon-zamon", "Sohibqiron" kabi o'nlab taronalar bugun xalqimizning haqiqiy ma'naviy mulkiga aylanib qoldi. Chunki uning qo'shiqlari yangraganda sanoat ishchisi dastgohi yonida

tik qotgan, dehqon ketmoniga suyanib, do'ppisini ensasiga surgan, yo'lovchi jon qulog'i bi-lan tinglab, qo'shiq tugaguncha to'xtab turgan.

Ha, katta san'atkor, buyuk hofiz Sherali Jo'rayevning xotirasi har birimizning qalbimiz-da yashaydi, qo'shiqlari mangu jarang sochib, kelajak avlodlarni ham ezigulik, yaxshilik, mardlik va halollikka da'vat etib turadi.

O'rinboy NORMATOV,
jurnalist.

Ko'p uzoqqa bormaylik, yangi-lanayotgan O'zbekistonimizning so'nggi yillari istiqbol davrining dastlabki o'n yilliklari bilan taqqos-lansa, barcha sohalar-da sezilarli o'zgarishlar, yutuqlarga erishgani-mizni ko'rish mumkin. Bu mavzuda uzoq va ko'p gapirib, o'quvchining qimmatli vaqtini olmoqchi emas-man. Faqat kezi kelganda, bir nar-sani ochiq e'tirof etishimga ijozat berasiz.



Osoyishta
yurtida

ERKIN
IBODAT

Diniy sohada xizmat qilayotganimga chorak asrdan oshib qoldi. Shu davr ichida yurtdoshlarimga islom dinining fazilati, tarbi-yaviy ahamiyati to'g'risida qo'ldan kelgancha tushuncha beryapmiz. Berayotgan ilimimiz kimgadir manfaatli bo'lsa, bizning yutug'imiz shu. Faoliyatim davomida turli og'ir kunlar, ta'bir joiz bo'lsa, muayyan qiyinchiliklarga ham duch keldim. O'tgan ishma salovat, deganlari-day, endi bularni eslab o'tirishni lozim top-mayman, zero, oqar suv oqib ketdi.

Ko'pchilik e'tirof etayotganidek, har bir soha o'z yo'nalishida taraqqiyotning yangi davrini boshidan kechirmoqda. Muqaddas dinimizga bo'lgan e'tibor ham bugun har qachongidan boshqacha. Bu masjdlar, mad-rasalar va muqaddas qadamjolar obodligiga turtki bo'layotir. O'sib kelayotgan farzand-larimiz tarbiyasida soha xodimlarining o'rni beqiyos. Bu mas'uliyatni dildan his qilgan imom domlalar o'z ustida tinimsiz ishlashlari lozim.

Xalqimiz bugungi osoyishtalik soyasida er-kin ibodat qilayotgan ekan, buni olib borilayot-gan to'g'ri va oqilona siyosat mevasi deb bilamiz. Shuni aniqlik, endi cho'chib, atrofga alanglab ibodat qilingan davrlar o'tdi. Shunday kunlarga yetkazgan robbimizga shukurlar qilib, bunday tinchlik va xotirjam yashash, ishlash, ibodatlar qilish ne'mati qadriga yetishimiz zarur.

Ma'murjon UZOQOV,
Samarqand shahridagi "Darg'om"
jome masjidi imom-xatibi.

Keyingi kunlarda yana Sa-marqand o'zining dabdabali, serchiqim to'ylari bilan ja-moatchilik e'tibori markazida bo'lmoqda. Yaqinda "Zaraf-shon" gazetasida chop etil-gan "Samarqandda yana "pul yomg'iri" sarlavhali ma-qola ham buni tasdiqlaydi. Unda xususan, milliy valyu-tamizni oyoq osti qilayot-gan va shu yo'l bilan obro' topishga urinayotgan fuqa-rolarning harakatlari keskin tanqid qilingan. Afsuski, bu hammasi emas, me'yorni yo'qotgan ayrim odamlarimiz to'y uchun yangi udumlar, marosimlar o'ylab topishda davom etyapti.

Qaysi rahbar ibrat
uchun to'y qiladi?



Jamiyatimiz yuzidagi bu dog'ning yanada bo'rtib ko'rinish berayotgani sababi nimada? Axir, o'tgan yillarda uni yo'qotish uchun ozmuncha ish qilinmadimi? Tushuntirishlar, ogohlantirishlar, jarimalar xulosa chiqarishimiz

uchun yetarli bo'lishi kerak edi-ku. Ammo bunday bo'lmadi.

Nazarimda, buning sababi yuqorida-gi barcha profilaktik ishlar, hatto jazo choralari ham asosan o'rtahol aholi qatlamiga qaratilganida. Shu yo'l bilan

Aks-sado

biz ularga "boylarga ergashmang", degandek bo'ldik. Bu vaqtda "katta"lar bilganini qildi va xalq buni ko'rdi.

Jarima-chi, deysizmi? 3 yoki 4 mil-lion so'm jarima to'lash boylar uchun hech gap emas. Biz buni inobatga oldikmi, yo'q, albatta. Oqibati ma'lum, dabdabali to'y-larga qarshi kurashish tadbirlarining samarasi kamayib bor-moqda. Bir necha yuz kishilik to'ylar, bir necha kun davom etadigan nahorlar va marosimlar yana bo'y ko'rsatdi.

Xulosalarim shuki, to'ylarni qanday o'tkazish bo'yicha "katta"larimiz "mas-ter-klass" ko'rsatishi kerak. Obro'li idoraning rahbari o'tkazgan kamchiqim to'ylarni elga namuna qilish lozim. Shunda ular "Falonchi boydan kam joyim bormi?", deb emas, "U insonda bor farosat menda yo'qmi?", deya to'y qiladi. Turdi TURSUNOV.

MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 16 428 nusxada chop etildi. Buyurtma 510. Hajmi 2 bosma taboq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxona manzili: Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da. Bosishga topshirildi: soat 19:00

Navbatchi muharrir:

A.SHERXOLOV.

Navbatchi:

G.MO'MINOVA.


Sahifalovchi:

B.ABDULLAYEV.



Saytimizga o'tish uchun QR-kodini telefoningiz orqali skaner qiling

ISSN-201667X



Sotuvda narxi kelishilgan holda